

EKALESIA FA'APOTOPOTOGA KERISIANO  
I AMERIKA SAMOA

# 'AU LEOLEO

TUSI FAILOTU  
2021



*IA TATALO MA MATAALA*

EKALESIA FA'APOTOPOTOGA KERISIANO  
I AMERIKA SAMOA

**'AU LEOLEO**

**TUSI FAILOTU  
2021**



***IA TATALO MA MATAALA***

**Laulau Mafutaga Aoao 'Au Leoleo EFKAS:**

Tautalatasi P. Fanolua FT, Peresitene  
Mafutaga Faaleaoga FT, Failautusi  
Tafailematagi Muasau FS, Teutupe

**Saunia leni Tusi Failotu:**

***Aufaigaluega Pulega USO***

Logovii Polu FT

Suipi Vaielua FS

Ulumoo V. Ale FS

Stephen Tukumoatu FS

## UPU TOMUA

Faamalo atu le folau i le mamalu o la tatou Ekalesia, lenei ua tatou aulia ma le manuia mai lenei tausaga fou i le alofa ma le agalelei o lo tatou Tapaau i le lagi. Foi la'ia o le mua ma le faasao i le Atua, auā ua IA faia mea sili ua tatou olioli ma fiafia ai.

Aisea ua faaigoaina ai le 'au toaaga e fai talosaga, "o le 'Au Leoleo?" O le a se sootaga a tatalo ma leoleo? E faapefea ona e "leoleo," a o e tootuli i ou tulivae ma moeiini ou mata ma tatalo?

Na ta'ua e A. T. Pierson le mea aupito taua i le agai i luma o le galuega tala'i a le Ekalesia e faapea: - "O laasaga uma i le faatuputupuina o le galuega tala'i, e tala lava lona amataga i talosaga. O le tatalo, o le tapenaga taua lea mo soo se manumalo fou, ma, o le mea lilo i soo se faaecaina" (*Every step in the progress of mission is directly traceable to prayer. It has been the preparation for every new triumph and the secret for all success.*)


Se'i toe iloilo lo tatou soifua galulue i le feau a le Alii, pe na i ai ni manumalo ma se aga'i i luma, pe na o le toilalo ma le solomuli. Afai e leai ni oga eleele fou faaopoopo, leai ni ogasami fou na ausia, leai ni matati'a fou na faatuina, ni malosi fou na maua, ma ni auupega fou na talia ma faaaogaina; faamata o le tali, ona ua vaivai ma ua lafoai lo tatou soifua mai le ola tatalo?

Ua faamanatu mai e le Poto mo tatou le tatalo e fiafia i ai le Alii ma na faafofogoina: -

*"O le taulaga a e amio leaga e inosia lea e le ALII, a o le tatalo a e amiosa'o o lona lea fiafia. E maa le ALII i e amioleaga, ae faafofoga mai o IA i le tatalo a e amlotonu" (Faataoto 15:8-9).*

Ua valaauina tatou le 'au faatuatua ina ia tatou faamalolosi e saili ala e fiafia le Alii e faafofoga mai ai, a o tatou galulue ma tautua ai i ana feau. Ia manatua, o tatou o leoleo o le Aiga ma le fanau a le Atua i soo se itu o le lalolagi e ala i a tatou tatalo ma talosaga.

O le susuga i le toeaina ia Logovii Polu ma le 'Aufaigaluega o le Pulega a USO sa feagai ma lea ta'iala e fesoasoani atu ai i la tatou Ekalesia fai tatalo. Malo tapena. Ia manuia tiute ma faiva, aemaise o Mafutaga a le Au Leoleo i lenei tausaga i le faatasi mai o le Agaga Paia.



**Tautalatasi P. Fanolua FT, Peresitene**  
Mafutaga Aoao 'Au Leoleo EFKAS

## IANUARI 2021

### **IANUARI 2:**

Tusi Faitau: Salamo 118:1-4

Matua: f.1 - *“Vivii atu ia outou i le ALII, auā e lelei o ia; auā e faavavau lava lona alofa.”*

Autū: **“E TUMAU LE ALOFA O LE ATUA”**

Tatou Faafetai i le Atua: -

1. I lana ta’ita’iga mana o lo tatou folauga mai le tausaga ua mavae, ua tatou taunu’u mai ai i lenei tausaga fou;
2. Ona o lona le tu’ulafoa’i o le folauga, e ui i le tele o matagi vale o le olaga sa fetai’a’i, ae sa agalelei ma tausia i tatou i lona alofa;
3. Ona o le tele o ana faamanuiaga sasa’a mai, ua tatou manuia ai.

Tatou Faatoese i le Atua: -

1. Ona o lo tatou lē anaana i ana poloaiga ma tausia ana tulafono;
2. Ona o lo tatou faatamala i le ola vivii i le Alii, a ua faamuamua pea mana’oga o le olaga;
3. I le lē faia o tatou tiute ma le faamaoni, a ua fai tau ina faataunu’u.

Tatou Tatalo i le Atua: -

1. Ia manuia le folauga i lenei tausaga, e ala i lona faatasi mai;
2. Ia lavea’iina i tatou mai faigata tatou te fetai’a’i ai i le ala;
3. Ia tatou maua le loto fiafia e galulue ai mo IA i lenei tausaga, ma saga viia ai o IA e faavavau.

### **IANUARI 9:**

Tusi Faitau: Kenese 15:1-5

Matua: f.1 - *“Ua mavae ia mea, ona tulei mai lea o le afioga a le ALII ia Aperamo i le faaaliga, ua faapea mai, ‘Aperamo e, ‘aua e te fefe; o a’u nei o lou talitā, o lou tau i e matuā tele lava.’”*

Autū: **“IA FAATOILALOINA LE FEFE”**

Tatou Faafetai i le Atua: -

1. Ona o lona o’oa’o mai ia ‘aua ne’i o tatou fefefe, a ia ola talitonu ma tumau ia te IA;
2. Ona o IA lava o lo tatou talitā, tatou te malu ai i soo se faafitauli;
3. Ona o lona mana faamalolo ua tafieseai ai gasegase uma e feagai ma ona tagata.

Tatou Faatoese i le Atua: -

1. Ona o lo tatou ola fememea’i pea, ua fai ma ala e galo ai ia i tatou, o loo i ai le Alii i le malaga;
2. Ona ua avea le fefe ma a’upega a le fili e noatia ai lo tatou galulue ma le faamalolosi;

3. Ona o le tele ma le faula'i o a tatou agasala ua faia ma le iloa, atoa foi ma agasala ua faia ma le leiloa.

Tatou Tatalo i le Atua: -

1. Ia mua'au ma muli'au o IA i o tatou ala uma e manuia ai;
2. Ia ta'ita'ieseina tatou mai le ola fefefe ma le popole, pe a lutia i faigata o le olaga;
3. Ina ia tatou maua le faatuatua moni e tumau ai pea ia te IA i aso uma e le aunoa.

### **IANUARI 16:**

Tusi Faitau: II Timoteo 3:1-15

Matua: f.14 - *"A o oe, ia e tumau i mea ua a'oa'oina ai oe, ma ua mauintinoa ia te oe, ina ua e iloa o ia na a'oa'o atu ai ia te oe."*

Autū: **"I LE SOLO LELEI PO O LE FAIGATA"**

Tatou Faafetai i le Atua: -

1. Ona ua amatalia le malaga ma le faamoemoe ola, ia mua'au ma muli'au lau afio i laasaga uma o le a feagai ma lau fanau;
2. Ona o le loto faatuatua ua totō i o tatou tagata, tatou te mafaufau ai ma le filemu ma le talitonu faamaoni, e saogalemu le faigamalaga e ala i lau ta'ita'iga;
3. Ona o le togiola na saunia e lesu Keriso, auā le lavea'iina o tatou mai le loloto o le agasala.

Tatou Faatoese i le Atua: -

1. Ona o ni a tatou galuega ua tu'u le mae'a i lena tausaga ua mavae, ina ua avea lo tatou popole vale i faigata na osofa'ia ai le malaga;
2. Ona ua avea tu'inauga o le olaga ma avanoa ua tatou se'e ese ai mai le ola usita'i atu i le Alii ma lona finagalo;
3. Ona o lo tatou faataligatuli i lona a'oa'o mai o ala talafeagai o ana afioga, tatou te manuia ai.

Tatou Tatalo i le Atua: -

1. Ia lavea'iina i tatou mai fili o le olaga e osofa'ia ai la tatou faigamalaga i lenei tausaga;
2. Ia tatou maua le fiafia e tufi taufao ai mea sili o lona malo, e taoso ai le malaga;
3. Ia avea o IA ma ta'ita'i malaga e faatonutonu i le sololelei po o le faigata o le ala o le a uia.

### **IANUARI 23:**

Tusi Faitau: Mataio 18:11-20

Matua: f.20 - *"Auā o le mea ua faapotopoto ai se toalua, po o se toatolu i lo'u igoa, ou te i ai faatasi ma i latou."*

Autū: **"O LE ATUA MA LOU AIGA"**

Tatou Faafetai i le Atua: -

1. I le faamanatu mai pea ia i tatou le tāua o le ola faapotopoto, ma le mafuta faatasi o aiga, e faasoa ai le Atua ma lona agalelei;
2. Ona o le manuia o tatou aiga, o vaaia ai pea foliga alofa o le Atua, e ui i uiga tosina o le lalolagi;
3. Ona o lona alofa le mavae o loo tausii mai ai pea i tatou i aso uma.

Tatou Faatoese i le Atua: -

1. Ona o lo tatou manatu faatalalē i le faamaopoopoga o mafutaga ma aiga, aemaise ai le aiga o le Atua, ma ta'uta'u lona suafa, auā o loo fia mafuta pea ma lana fanau;
2. Ona o le le maua o le loto maualalo i le tele o aso e taliaina ai ma le alofa isi tagata i le suafa o le Alii;
3. Ina ia faamagalalo lo tatou vaivai faaletagata, e ala i le soifua paia o Iesu Keriso lo tatou Alii.

Tatou Tatalo i le Atua: -

1. Ia sisila mai pea ona fofoga alofa, ma faamanuia i soo se faapotopotoga e ta'ua ai lona suafa;
2. Ia maua pea mafaufauga lelei, auā le manuia o aiga, nu'u, malo, aemaise lana Ekalesia;
3. Ia atagia ona foliga alofa i mea uma tatou te faia.

### **IANUARI 30:**

Tusi Faitau: Isaia 43:18-25

Matua: f.25 - "*O a'u, o a'u lava lē soloi'esea au solitulafono, ona o a'u lava; o au agasala foi ou te le manatua ia.*"

Autū: **“O LE POGAI O LE FAAFOUINA”**

Tatou Faafetai i le Atua: -

1. Ona o le manino o lona fetalai mai ua tatou iloa ai, o IA lava na te fufulueseina o tatou solitulafono e ala ia Iesu Keriso;
2. Ona o lona faapalepale faa-Tamā, na te le manatua ai le vaivai o lana fanau i le va tu nonofo ma IA;
3. Ona o IA o le pogai o lo tatou ola faafouina, e ala i le loto salamō mai i a tatou agasala.

Tatou Faatoese i le Atua: -

1. I lo tatou fultua soo mai ia te IA, ina ua faia o tatou lava loto, a ua le gaua'i i lona finagalo;
2. Ona o lo tatou fiafia pea e soli ana tulafono, a ua le ola ai;
3. I lo tatou fiafia e faia le agasala ma le manatu e faagalalo e le Atua.

Tatou Tatalo i le Atua: -

1. Ia lavea'i i tatou mai le ola tu'inaanau, ua le maua ai le agaga o le faafouina moni e ala ia Keriso;
2. Ia tatou maua le ola naunau ia te IA ma anaana i ana tulafono;

3. Ia ta'ita'iina pea tatou i lona lava filemu.

## FEPUARI 2021

### **FEPUARI 6:**

Tusi Faitau: Faataoto 3:1-6

Matua: f.6 - *"Ia e manatua o ia i ou ala uma, ona faatonuina ai lea e ia lava ou ala."*

Autū: **"IA MANATUA LE ATUA"**

Tatou Faafetai i le Atua: -

1. I lona le faagaloina o tatou, ae 'auai mai pea e ala i lona agalelei;
2. Ona o le malosi tupu pea, tatou te tausili ai i le faia o mea lelei e viia ai lona suafa;
3. Ona o le 'oa o ana afioga, o loo fai ma ta'ita'i tama i lo tatou ola i aso uma ma taimi uma.

Tatou Faatoese i le Atua: -

1. Ona o le tele o taimi e pupū ai o tatou loto i le sailiga o ala i le tino, ae le manatua ai ala o lo tatou Alii;
2. Ona ua tatou faalagolago i lo tatou atamai, a ua le fesiligia ai o IA o le atamai lilo;
3. Ona o lo tatou tau mamao ese ma IA, ua avea ai ma ala tatou te le iloa ai ona faia faaiuga lelei auā le manuia o lana fanau.

Tatou Tatalo i le Atua: -

1. Ia fafagu mai lo tatou ola mataala e manatua o IA i aso uma;
2. Ia le faia lana galuega i so tatou lava iloa, a ia tapuvae tasi i lona lagolago ma faatonu mai i mea e ao ona tatou faia;
3. Ia faamanatu mai i o tatou loto, e leai se mea tatou te mafaia e aunoa ma IA.

### **FEPUARI 13:**

Tusi Faitau: Roma 4:1-8

Matua: f.3 - *"Auā se a ea ua fai mai ai le Tusi? 'Na faatuatua Aperaamo i le Atua, ona ta'ua ai lea ia te ia e fai ma amlotonu.'"*

Autū: **"A LEAI SE FAATUATUA, E LEAI SE LUMANAI"**

Tatou Faafetai i le Atua: -

1. Ona o le moni o ana Afioaga, a aunoa tatou ma le ola faatuatua atu ia te IA, ua leai so tatou lumana'i;
2. Ona o le alafua ua IA faataoto mai mo tatou e tau atu i le manuia;
3. Ona o le soifua o lona Alo, ua totogi ai le tau o a tatou agasala.

Tatou Faatoese i le Atua: -

1. Ona o le papa'u o lo tatou ola faatuatua ia te IA, ua le manino ai lona fetalai mai ia i tatou;

2. Ona o lo tatou toilalo soo i faasalavei a le tiapolo, ua le mau ai le pipii ia Keriso e ala i le faatuatua;
3. Ona o le tele o lona alofa, a ua tatou faatalalē i le tausiga o lea alofa i le va ma isi o tatou uso.

Tatou Tatalo i le Atua: -

1. Ia maua le fiafia e usita'i ai i lona finagalo e ala i le faatuatua;
2. Ia tulimata'i se lumana'i manuia e ala i le ola faatuatua ia te IA ma a tatou galuega faatino;
3. Ia maua le malosi e filigā ai ma le faamaoni e faatino o tatou tiute i le mafai e gata ai.

### **FEPUARI 20:**

Tusi Faitau: Kalatia 6:9-10

Matua: f.10 - *“O lenei, ia tatou agalelei, ia faatatau i mea e tutupu i lea aso ma lea aso, i tagata uma lava, aemaise i le aiga o le faatuatua.”*

Autū: **“E MAFAI ONA OU FESOASOANI ATU”**

Tatou Faafetai i le Atua: -

1. Ona o lea agaga tāua ua IA faailoa mai e le gata mo tatou, a o soo se tasi o lana fanau, ina ia ofo atu la tatou auaunaga, i ituaso ua moomia ai le fesoasoani;
2. Ua le fua pauina lo tatou agalelei atu na o tatou aiga ma e masani, ae mo soo se tagata;
3. I lona agalelei mai ma lana tausiga ia i tatou i aso uma ma soo se mea tatou te ole atu ai.

Tatou Faatoese i le Atua: -

1. Ona o lo tatou ‘alogofie mai le ola agalelei atu i isi uso a tagata;
2. Ona o lo tatou manatu faapito na o i tatou lava, a ua misi ai le aapa atu e tali i mana’oga e tula'i mai i lea aso ma lea aso;
3. Ona o lo tatou le tuu avanoa e talia lona faatonu mai, a ua faia lava le mea ua tatou loto i ai mo tatou lava, ae le o isi.

Tatou Tatalo i le Atua: -

1. Ina ia faia ma le loto atu la tatou tautua, aemaise Iana fanau o fia o’o atu i ai le fesoasoani;
2. Ina ia le faapito manū ia tasi, a ia aofia tagata uma i manuia e faaso mai e le Atua.
3. Ina ia sologa manuia pea ala o le savaliga o faia nei.

### **FEPUARI 27:**

Tusi Faitau: Esekielu 34:25-31

Matua: f.26 - *“Ou te faatoto ifo le ua i ona lava po; e i ai uaga e manuia ai.”*

Autū: **“O UAGA O FAAMANUIAGA”**

Tatou Faafetai i le Atua: -



1. Ona o lona le tuulafoa'iina o i tatou lana fanau;
2. Ona o lona liligi faaua mai i ala eseese o manuia ua tatou sapi ai ma faaaoga ai i lana galuega;
3. Ona ua le gata i manuia faasoa mai, a o tatou ola foi ma le malosi.

Tatou Faatoese i le Atua: -

1. Ona o lo tatou ola soona fai o ana faamanuiaga tuuina mai, a ua le faaaoga ma le tatau i aso ta'itasi;
2. Ona o le faaaoga sese o lo tatou malosi, e faia ai uiga e le talafeagai ma le ola faa-kerisiano;
3. Ona o lo tatou ola faatumutumu lima i lana galuega paia.

Tatou Tatalo i le Atua: -

1. Ina ia pule faasoa mai lava o IA, i mea uma e aoga i lana galuega ma o tatou tagata faatauvaa;
2. Ina ia tatou maua le agaga o le fefaasoa'i o ana meaalofa, ae le o le ola aputiputi, auā e le o lona finagalo lea mo i tatou lana fanau;
3. Ina ia avea ana faamanuiaga ma ala e faatumauina ai pea lo tatou so'otaga ma IA e faavavau.

## MATI 2021

### **MATI 6:**

Tusi Faitau: Galuega 28:1-6

Matua: f.5 - *“A ua lūlū atu e ia le mea feai i le afi, ua le lagona se leaga.”*

Autū: **“LŪLŪ ESE LE MEA FE'AI”**

Tatou Faafetai i le Atua: -

1. Ona o lona lavea'i mai o tatou mai le tele o ū fanafana a le fili, o loo taumafai e lepeti lo tatou ola mo IA;
2. Ona e le o tuulafoa'iina i tatou e ūtia e mea fe'ai o lenei olaga, ae o loo IA puipui mai i tatou lana fanau;
3. Ona o le galuega lavea'i a Keriso lesu, ina ia faaolaina tatou mai le loloto o le agasala.

Tatou Faatoese i le Atua: -

1. Ona o lo tatou pau'ū pea i le olaga tusitusi lima ma le vaai maulalo i isi, a ua le vaai ifo lava le tagata ia ia te ia ma ona sese;
2. Ona o le le faatuatuaina o tiute lelei o faia e nisi mo le manuia o lana galuega;
3. Ona ua tele ina tatou faifai upu ma fatu tala sese i lana galuega, a ua le lūlū ese mea fe'ai o loo fetolofa'i ma afaina ai le galuega.

Tatou Tatalo i le Atua: -

1. Ina ia mafai ona tatou lūlū ese le agasala, ua fai ma faalavelave i le galuega'iina o lana galuega;
2. Ina ia lavea'iina tatou mai le ola faamasino atu;
3. Ina ia manuia pea le folauga e ala i lona alofa tunoa.

### **MATI 13:**

Tusi Faitau: Iopu 23:10-17

Matua: f.10 - *“A e peitai ua silafia e IA lo'u lava ala; a tofotofoina a'u, oute sao atu ai e pei o le auro.”*

Autū: **“TOFOTOFOINA MA FAAMAMĀINA I TATOU”**

Faafetai i le Atua: -

1. Ona o luitau o le ola e tofotofoina ai tatou i lea aso ma lea aso, ua tatou sao mai ai ona o lona puipui mai;
2. Ona e le gata o IA ua tatou sao ai mai le ola tofotofoina, ae na te faamamāina foi i tatou mai le agasala ua pispisia ai le olaga;
3. Ona o lona mafuta mai pea ia i tatou, ma saga faamalosi atili lo tatou naunau i lana galuega.

Tatou Faatoese i le Atua: -

1. Ona o le tele o taimi e tofotofoina ai tatou i faigata, ua tatou le iloa ona tetee atu ona ua tatou o ese ma IA;
2. Ona ua tatou le ole ia te IA e laveai tatou mai i fita o le olaga;
3. Ona o lo tatou ola faatamala i le tele o taimi, ua le atagia ai foliga alofa o lo tatou Alii i o tatou olaga.

Tatou Tatalo i le Atua: -

1. Ina ia laveai tatou mai faigata uma o le olaga;
2. Ina ia taofia tatou mai le faavaivai e asaina fita e lutia ai i le ala;
3. Ina ia maua pea le ola mautinoa i o tatou loto, o loo sisila mai fofoga alofa o le Alii i mea uma tatou te faia mo lana galuega paia.

### **MATI 20:**

Tusi Faitau: Roma 13:1-5

Matua: f.1 - *“la usiuitai tagata uma i faipule silisili; auā e leai se pule pe a le mai le Atua.”*

Autū: **“E LEAI SE PULE PE Ā LE FINAGALO AI LE ATUA”**

Tatou Faafetai i le Atua: -

1. Ona o lana faasinomaga i si o tatou atunu'u, ma lona tofia o matai e lipoina upu fai o aiga, nu'u, ma itumalo;
2. Ona o le utaga loloto ma le tofa mamao o loo IA faailoa mai auā le soifua fetuutuuna'i o ala lelei mo le saogalemu o ona tagata;
3. Ona ua tatou talitonu e ala i le faailoa mai e ana Afioga, e leai se pule e taualoa, pe a le finagalo i ai o IA.

Tatou Faatoese i le Atua: -

1. Ona o le faaoga sese o le pule ua tuuina mai, e fai ai mea e le talafeagai ma lona finagalo;
2. Ona o le malosi o au tatafe o suiga, ua lofia ai aiga, nu'u, ma Ekalesia, ma ua foliga ua manunu ai pulega lelei auā se manuia mo ona tagata;

3. Ona o pulega so'ona fai ua faigata ai le ola o tagata, ina ua aunoa ai ma se faautauta tonu e lima ta'ita'iina ai le fanau a le Atua.

Tatou Tatalo i le Atua: -

1. Ina ia 'aiā ina e lona Agaga le faia o faaiuga lelei e Alii ma Faipule o nu'u ma aiga, aemaise o ta'ita'i o le Ekalesia;
2. Ina ia tausisi pea le amlotonu e manuia ai ala o ta'ita'iina;
3. Ina ia foai mai mafaufauga lelei e tua i ai le faia o faaiuga atamai mo le manuia o aiga, nu'u, aemaise lana galuega.

### **MATI 27:**

Tusi Faitau: Sakaria 9:9-12

Matua: f.9 - *“la alaga fiafia oe le tama fafine a Ierusalem; faauta, o le a alu atu lou Tupu ia te oe; o ia o le amlotonu ma le faaola.”*

Autū: **“O LE MALAGA A LE TUPU UA LOA ONA VALO'IA”**

Tatou Faafetai i le Atua: -

1. Ona o lona filemu ua tatou aulia ai le vaitau o ona puapuaga, e ui ina faigata ae taunu'u i le manumalo;
2. Ona o le faataunu'uina o valoaga a le perofeta i le malaga a le Tupu o tupu, ua leva ona afuafua le fia taunu'u i Ierusalem;
3. Ona o ala tāua ua faaali manino i le Ekalesia, o le loto maualalo ma le agamalu, o aga ia a le Tupu.

Tatou Faatoese i le Atua: -

1. Ona o lo tatou lē fia ui i ala faigata, ae na o ala faigofie;
2. Ona o le faavaealuātai o tatou lagona ua le moni ai le tāua o le malaga faa-Tupu a le Alii lo tatou Faaola;
3. Ona ua silimusa ia i tatou le faasatauroina pea o lo tatou Alii, ona o uiga vaivai o le olaga.

Tatou Tatalo i le Atua: -

1. Ina ia faapaiaina o tatou ola e taliaina ai ma le fiafia, le faamanatuina o le malaga faa-Tupu a lo tatou Alii;
2. Ina ia maua le loto maualalo ma le agamalu e faatino ai ma le fiafia a tatou feau mo le lelei o lana galuega.
3. Ina ia tatou faailoa atu lana faaolataga i soo se mea tatou te i ai.

## **APERILA 2021**

### **APERILA 3:**

Tusi Faitau: Ioane 19:39-41

Matua: f.40 - *“Ona la ave lea o le tino o Iesu, ua teuteu i le 'ie e tanuma'i atoa ma mea manogi.”*

Autū: **“O LE FAAALIGA O PELEGA O LE ALOFA MA LE FAAALOALO FAATUPU”**

Tatou Faafetai i le Atua: -

1. Ona o le faaaloalo faatupu o ia Tamā pei ona ta'ua i le Tusi Paia, ua la faatino ai se mea sili mo lesu le Tupu o le lagi ma le lalolagi;
2. Ona e le taugofie le faaaloalo, ae ua faia ma lo la mautinoa, e le toe i ai se isi Tupu i tala atu o lesu;
3. Ona ua tatala mai le avanoa mo i tatou e fai mea sili ai mo IA.

Tatou Faatoese i le Atua: -

1. Ona o lo tatou manatu māmā i le ola faaaloalo ia te IA ma le galuega, a ua fai ma mea noa i o tatou loto;
2. E le o mea sili tatou te avaga lima ai pelega o le alolofa ia te IA;
3. Ona o lo tatou le mau manatu i lona faaali mai pea ia i tatou, o lona alofa tele ua mafua ai ona IA uia ala o puapuaga.

Tatou Tatalo i le Atua: -

1. Ina ia ifo manū i le aai o finagalo, tatou te matuā va'ava'ai ma le ootia i mea tiga na o'o i lo tatou Alii;
2. Ina ia tatou maua se Eseta manuia i lona alofa;
3. Ina ia foi lava ia te IA le viiga, ona o lona le tau'i ma sui.

### **APERILA 10:**

Tusi Faitau: Galuega 5:29-32

Matua: f.32 - *“O ana molimau foi i ia mea o i matou.”*

Autū: **“O LE TOETU O KERISO UA TATOU MAUA AI LE OLA FOU IA TE IA”**

Tatou Faafetai i le Atua: -

1. Ona o lona toe tu manumalo e ala i lona Alo, ua faafouina ai o tatou ola e fai ma ave feau faatuatuaina mo IA;
2. Ona o le aumaia o le loto tele tatou te ta'utino atu ai le moni o tala o lona manumalo;
3. Ona ua ave lona manumalo i mea uma ua fai ma ala e faamalosia ai le folafolaina o le Tala Lelei o le ola fou.

Tatou Faatoese i le Atua: -

1. Ona o lo tatou fiafia pea e ola i le olaga tuai, a ua le talia le ola fou na IA saunia e ala i lona soifua;
2. Ona o lo tatou le fia talia o le olaga salamō mai o tatou sese;
3. Ona o le tuta'ia gofie o lo tatou ola molimau mo lesu, pe a faasalavei mai satani i o tatou ala.

Tatou Tatalo i le Atua: -

1. Ina ia maua le olioli o le ola fou ua faamamāina e ala ia Keriso;
2. Ina ia le 'alo i le ataata o le la'au, a ia ola molimau atu i le taulaga tele na saunia e lesu Keriso;
3. Ina ia tumau le alofa o Keriso i o tatou ala.

### **APERILA 17:**

Tusi Faitau: Salamo 32:6-11

Matua: f.8 - *“Ou te a’oa’o ia te oe, ma faasino ia te oe i lea lava ala e te savali ai; ou te faatonu ia te oe, ma ou vaai ia te oe.”*

Autū: **“IA NAUNAU E MULIMULI I LE TA’ITA’IGA A LE ATUA”**

Tatou Faafetai i le Atua: -

1. Ona o lona faasino ala mo i tatou i le mamana o lana ta’ita’iga;
2. Ona o lona naunau mai ina ia tatou mulimuli tonu ia te IA;
3. Ona o lona lava lelei e le ma faamatalatalaina, ina ne’i o tatou sese ese mai ala o lona alofa tunoa.

Tatou Faatoese i le Atua: -

1. Ona o le naunau o tatou loto i le faia o mea tatou te e mana’o ai, a ua le tatala atu i le faasinoga a lo tatou Matai Sili;
2. Ona o le tele o taimi tatou te fesiligia ai le ta’ita’iga amlotonu a lo tatou Alii, poo tonu ma sa’o;
3. Ona o lo tatou to’ilalo pea i le fiafia i le lalolagi ma lona matagofie, a ua galo ai o le fiafia moni o i le Alii.

Tatou Tatalo i le Atua: -

1. Ina ia tatou usiusita’i i lana ta’ita’iga e manuia ai;
2. Ina ia tatou saili ia te IA, o le Puna o le malosi ma le ola maua pea;
3. Ia laveai i tatou mai ala pogisa o le olaga, a ia maua le mafanafana o le mafuta ma IA e faavavau.

### **APERILA 24:**

Tusi Faitau: Ioane 20:19-21

Matua: f.20 - *“Ua ia fetalai atu lea mea, ona faaali atu lea o ona lima ma lona itu. Ona olioli ai lea o le au soo ina ua latou vaai atu i le Alii.”*

Autū: **“UA TAPISA I LE OLIOLI ONA UA MAUTINOA”**

Tatou Faafetai i le Atua: -

1. Ona o ala manuia o le faaolataga ua taunu’u, ua tapisa ai i le olioli ona ua mautinoa le faamoemoe i le lumanai;
2. Ona e ui i le tu’u fesili o le fememea’i, ae aumaia pea e le Atua ataata manino o le mafutaga faatasi ma IA;
3. Ona o le paia o le toe soifua manumalo o lo tatou Alii, ua fia se’e ai le kerisiano e faailoa atu le tala o le ola.

Tatou Faatoese i le Atua: -

1. Ona o le ‘aiā ina pea e le loto masalosalo o tatou kerisiano;
2. Ona o le vaivai o lo tatou faatuatua e talitonu ai ma le matuā mautinoa e moni lava le toe tu manumalo o Kersio;
3. Ona o le le tumau o lo tatou ola fiafia ia te IA ma le galuega, a ua faasufi gofie i le suamalie o le fili ma ana mailei.

Tatou Tatalo i le Atua: -

1. Ina ia faatumuina tatou i le olioli moni e ola tutumau i lana galuega;
2. Ina ia mumū saesae lo tatou ola faatuatua ia te IA, e mafai ai ona tineia le faavaivai ma le ola augatā;
3. Ina ia le faia toa'i la tatou auaunaga mo IA, a ia faia ma le loto fiafia.

## ME 2021

### **ME 1:**

Tusi Faitau: loane 14:12-14

Matua: f.13 - "*O mea uma foi tou te ole atu ai i lo'u igoa, ou te faia lava.*"

Autū: **“O LE SUAFA O IESU KERISO E ‘AUGA I AI A TATOU TATALO”**

Tatou Faafetai i le Atua: -

1. Ona o le tofa manino o lona alofa tunoa, ua tatou aulia manuia ai lenei aso fou;
2. Ona o le ala ua IA faataoto mai, e tali mai ai i a tatou tatalo;
3. Ona o le mau pea o le toovae i lona finagalo, e talia ai so tatou faatauva, e ala i le suafa o lesu Keriso.

Tatou Faatoese i le Atua: -

1. Ona ua tatou o ese soo mai le alafua ua tuu mai tatou le ola ai;
2. Ona ua tatou manatu māmā i le va tāpuia ma IA;
3. Ona ua tatou faataligatuli pea i lona fetalai mai.

Tatou Tatalo i le Atua: -

1. Ina ia tatalaina pea lona finagalo agalelei, e talia ai o tatou mana'o lafo vale atu ia te IA, e ala i le suafa o lona Alo Pele;
2. Ina ia taofia i tatou mai le soona ole atu, a ia fuafua faatatau e tusa ma lona finagalo;
3. Ina ia avefa pea le soifua tatalo a lana fanau ma aupega malosi e tetee atu ai i fesoua'iga o le olaga.

### **ME 8:** (*Aso Sa o Tina*)

Tusi Faitau: Eseta 4:15-17

Matua: f.16 - "*O a'u foi ma lo'u galu teine matou te anapopogi faapena.*"

Autū: **“O LE TINĀ MATA'U I LE ATUA, E TO'A PEA LE TAI I ONA LAGONA”**

Tatou Faafetai i le Atua: -

1. Ona o le ata manino o tinā loto to'afilemu ma iloa lagona e faufau ai ni laasaga e ono tulai mai, e le gata i aiga, nu'u, malo, aemaise le galuega a le Atua;

2. Ona o lona faamalosī'au i tinā, auā le lagolagoina o tamā ma fanau i totonu o aiga;
3. Ona ua iloga galuega a tinā ae a le faamaopoopoina o mafutaga a tinā ma Ekalesia.

Tatou Faatoese i le Atua: -

1. Ona o ituaso e faaletonu ai le tu'ualalo a tinā i aiga, nu'u, malo, ma Ekalesia, ina ua tuuta'ia i le malosi o le fili ma ana mailei;
2. Ona ua avea le ola popole o tinā i tamā, ma avanoa ua le maua ai se saolotoga moni e faia ai faaiuga tonu;
3. Ona o lo tatou manatu māmā i tiute o tinā auā le sologa manuia o le galuega paia a le Atua.

Tatou Tatalo i le Atua: -

1. Ina ia maua e tinā uma le ola matata'u i le Atua;
2. Ina ia faamalolosi pea tinā i o latou faiva alofilima, na tuuina mai e le Matai o le Galuega;
3. Ina ia manuia le faamanatuina o le Aso Sa o Tinā i lenei tausaga.

### **ME 15:**

Tusi Faitau: Mareko 8:34-37

Matua: f.36 - *“Auā se a le aoga i le tagata, pe afai na te maua le lalolagi uma, a e maumau lona ola?”*

Autū: **“SE Ā LE AOGĀ I LE TAGATA PE AFAI NA TE MAUA LE LALOLAGI UMA, A E MAUMAU AI LONA OLA?”**

Tatou Faafetai i le Atua: -

1. Ona o le meaalofa o le ola ua aumai, tatou te faaaogaina ai ma le tatau mo Iana galuega;
2. Ona o lona finagalo ina ia avea o tatou ola ia aoga mo IA, e auala atu ai lona manuia i isi;
3. I lona faatonu mai pea o ala pulea lelei e maua ai le ola.

Tatou Faatoese i le Atua: -

1. Ona o le tele o fiafiaga o le lalolagi, ua fai ma ala e tosina i ai o tatou loto, ma tauaso ai le vaai faaleagaga i lona naunau mai;
2. Ona o le le moni o lo tatou ola ofoina atu mo IA;
3. Ona o a tatou amio ua le tusa i ona luma, ina ua tatou toilalo i mea o le lalolagi.

Tatou Tatalo i le Atua: -

1. Ina ia faasaoina tatou ma tu'uina atu pea ia te IA na te pulea;
2. Ina ia maua pea agaga mo IA ma lona malo e faavavau;
3. Ina ia le solomuli gofie mai le olaga filigā, pe a tele mea fai o le galuega, ma atina'ega o aiga.

**ME 22:**

Tusi Faitau: Galuega 4:29-31

Matua: f.31 - *“Ua tutumu foi i latou uma i le Agaga Paia, ma ua tautala atu i le Afioga a le Atua ma le loto tele.”*

Autū: **“TAUTALA MA LE LOTO TELE I AFIGA A LE ATUA, INA UA UTUPŪPŪINA E LE AGAGA PAIA”**

Tatou Faafetai i le Atua: -

1. Ona o le mana faatupu malosi o le Agaga Paia, na te faalototele i tatou e faailoa atu ana afioga ola;
2. Ona o le ofoina mai o le Agaga e tauto’alua ma i tatou i aso uma;
3. Auā a aunoa i tatou ma le mafutaga a lona Agaga Paia, tatou te le iloa ona faia lana galuega.

Tatou Faatoese i le Atua: -

1. Ona o lo tatou te’ena pea o le musumusuga a Ie Agaga Paia i o tatou loto;
2. Ona ua sili lo tatou faalagolago i lo tatou atamai e faatino ai lana galuega, a ua le seusilasila i le faatonu mai o le Agaga Paia;
3. Ona faatoa taunapa lava i le faatasi mai o le fesoasoani, pe a luluti tiga o le galuega.

Tatou Tatalo i le Atua: -

1. Ina ia faaavanoa o tatou loto, sei utupūpū e le Agaga Paia e tapena ai tatou mo le faia o lona finagalo;
2. Ina ia tatou talia le Agaga e fesoasoani i lo tatou vaivai;
3. Auā a aunoa ma lona Agaga, e leai se mea tatou te mafaia.

**ME 29:**

Tusi Faitau: Kalatia 3:23-26

Matua: f.26 - *“Auā o atalii o le Atua outou uma lava i le faatuatua ia Keriso.”*

Autū: **“UA TA’U FANAUINA I TATOOU A LE ATUA, ONA O LE FAATUATUA IA IESU KERISO”**

Tatou Faafetai i le Atua: -

1. Ona o lo latou ala i malo ua ta’u fanauina ai tatou a le Atua, e ala i le ta’ele o le faatuatua ia Iesu Keriso;
2. Ona ua avea le pine faamau o Iesu Keriso, ma avanoa tutusa mo soo se tasi o lana fanau e talitonu ia te IA;
3. Ona o le faaauauina pea o lona manatu mai ia i tatou.

Tatou Faatoese i le Atua: -

1. Ona e i ai taimi e lape ai lo tatou ta’u fanauina a le Alua, ina ua leai se faatuatua moni ia Iesu Keriso;
2. Ona ua fai le agasala ma faalavelave i o tatou ola auauna, ina ua tatou naunau i mea o lenei lalolagi;



3. Ona o lo tatou faamāmāsagia o lo tatou Alii o lesu Keriso, i le le ususita'i ia te ia ma faia lona finagalo i aso uma.

Tatou Tatalo i le Atua: -

1. Ina ia tatou maua le ola faatuatua moni e talitonu ai ma le loto atoa i ala o le alofa mai o lesu Keriso;
2. Ina ia teu i o tatou loto le ta'u fanauina o i tatou a le Atua, pe a o tatou taliaina lesu Keriso o lo tatou Alii Faaola;
3. Ina ia faasusulu mai pea lona malamalama e ta'i fanua i o tatou ala uma, a o tatou feagai ai ma lana galuega.

## IUNI 2021

### **IUNI 5:**

Tusi Faitau: Mataio7:13-17

Matua: f.14 - *“Auā e va apiapi le faitoto'a, e lauitiiti foi le ala e tau atu i le ola, e toaitiiti foi i latou o e maua.”*

Autū: **“O LE ALA I LE OLA”**

Tatou Faafetai i le Atua: -

1. Ua tatou aulia manuia le afa o le tausaga i lona tausī mai;
2. I lona faamanatu mai pea ia i tatou, e le faigofie le ala i le satauro;
3. Ona o IA lava na mua'i asaina le ala lea, ma toe faaiu ia te IA.

Tatou Faatoese i le Atua: -

1. Ona o lo tatou fīafia pea e ui i ala faigofie, a o ia laasaga e le tua lelei, ae tau i masei;
2. Ona o le faaseseina o tatou ala e le alii faatupu mala;
3. Ona o le vaivai o lo tatou ola faalatalata atu ia te IA i taimi tatau.

Tatou Tatalo i le Atua: -

1. Ina ia tatou tofo i le lelei o le ala na savalia e lesu Keriso;
2. Ina ia tatou maua le loto tetele e ui ai i le ala vā apiapi o faigata, auā o ala ia e tau i le ola e faavavau;
3. Ina ia manuia le savalia o le isi afa o le tausaga i lona puipui mai.

### **IUNI 12:**

Tusi Faitau: Ioane 15:12-17

Matua: f.12 - *“O la'u poloaiga lenei, ia outou fealofani, pei ona ou alofa atu ia te outou.”*

Autū: **“OLA I LE FEALOFANI”**

Tatou Faafetai i le Atua: -

1. I le faaali mai o lona finagalo maopopo, ina ia tatou tausī le fealofani;
2. I le faamanino mai, o le fealofani, o le fofō lea o fe'eseeseaiga e faasalāvei ai aiga, nu'u, malo, aemaise o lana galuega;

3. Ona o le fāgua i lona agalelei o tatou tagata, ma aumaia le manava o le ola fou tatou te iloa ai ona faafoi le viiga ia te IA.

Tatou Faatoese i le Atua: -

1. Ona o le vave tuuina o tatou olaga i le molimana'o a le tiapolo, a ua galo ai lo tatou Alii o lesu Keriso;
2. Ua tatou faatalalē e tausii le fealofani e pei ona poloa'iina ai i tatou e Keriso;
3. Ona o le faualuga o tatou manatu i le tele o taimi ua fai ma ala e ootia ai loto o isi foi o ana fanau.

Tatou Tatalo i le Atua: -

1. Ina ia faamanuia lo tatou atunu'u ma lana Ekalesia i soo se itu;
2. Ina ia fai ma ta'ifanua le nonofo i le fealofani ma le ala fetausia'i o lana fanau;
3. Ina ia folau pea i lagilelei lo tatou ola i lana tausiga alofa.

### **IUNI 19:** (Aso Sa o Tamā)

Tusl Faitau: Faamasino 21:23-25

Matua: f.25 - *"O ia ona aso sa leai se tupu ia lsaraelu, ua ta'itasi ma fai le mea e tusa i lona lava manatu."*

Autū: **"A LEAI SE TA'ITA'I, UA TA'APE TAGATA"**

Tatou Faafetai i le Atua: -

1. Ona o lana ta'ita'iga manuia o le soifua o tamā uma e le gata i aiga, o nu'u, ma malo, aemaise le Ekalesia;
2. Ona o le faatāuaina o tiute faata'ita'i o tamā i soo se auunaga, auā a aunoa ma lea, ua ususi lava le tagata i lona ala;
3. Ona o le tofa alualu mamao, ma le utaga loloto o loo faaaupagaina ai tamā, auā se manuia o aiga, tainane lana feau ma le galuega.

Tatou Faatoese i le Atua: -

1. Ona o le ola faatamala i-o tatou tiute auā le faamaopoopoina o aiga, nu'u, malo, e o'o a i lana Ekalesia;
2. Ona o lo tatou manatu māmā i lo tatou so'otaga ma IA, ua malepelepele soo, ona o tu'inanauga i o tatou loto;
3. Ona o le le moni o lo tatou ola taliaina o le galuega o le faaolataga na saunia e Keriso.

Tatou Tatalo i le Atua: -

1. Ina ia faamaligi mai ana faamanuiaga e faatofusia ai i tatou uma o lana fanau;
2. Ina ia tatou tufi taufao faalumaga o mea sili o lona malo e ta oso ai pea la tatou folauga;
3. Ina ia a'oa'oina pea tatou i ala moni o lona alofa, ma tumau ai i le ola talitonu ia te IA i aso uma.

## **IUNI 26:**

Tusi Faitau: Auega 3:21-24

Matua: ff.22-23 - *“Ona ua le mavae o lona alofa mutimutivale; e fou mai ia i taeao uma, e tele lou faamaoni.”*

Autū: **“O LE ATUA FAAMAONI”**

Tatou Faafetai i le Atua: -

1. Ona o le faamaoni o lona agalelei, ua manatu mai ai pea i o tatou tagata faatauvaa ma le agasala;
2. Ona o lona lava alofa e le tapula'aina, ae faavavau;
3. Ona o le tauluga o mea uma na auina mai ai lona Alo, ma faailo ai i le lalolagi lona faamaoni, e ala i le taulaga osia.

Tatou Faatoese i le Atua: -

1. Ona o lo tatou faasala ese mai le ala e tonu ma faamaoni;
2. Ona o lo tatou tosina pea i uiga ma amioga a le alii o le lalolagi;
3. Ia faamagalo tatou mai le tele o a tatou agasala, o loo faia pea e le tusa ai ma lona finagalo.

Tatou Tatalo i le Atua: -

1. Ina ia pa'i mai pea le musumusuga a lona Agaga i o tatou loto, tatou te faia ai ma le faamaoni o tatou tiute;
2. Ina ia avea o tatou aiga, nu'u, malo ma Ekalesia, ma tagata faamaoni mo IA, ma ta'ita'iina ai isi e le o maua lea uiga tāua;
3. Ina ia manuia le isi afa o le tausaga o le a tatou savalia, ia taumulia'i matagi i lona alofa lavea'i.

## **IULAI 2021**

## **IULAI 3:**

Tusi Faitau: 2 Samuelu 5:1-5

Matua: f.2 - *“Na fetalai foi le ALII ia te oe, 'E te leoleo i lo'u nu'u o Israelu, e fai fo'i oe ma ta'ita'i ia Israelu.”*

Autū: **“AUINA MA LE MANA”**

Tatou Faafetai i le Atua: -

1. Ona o lona saili mai i lana fanau faatuatua i le ao atoa ma le po;
2. Ona o le lotolotoi pea o lona Agaga faatasi ma i tatou, i soo se mea tatou te feagai ai;
3. Ona o lona mana ua mafai ai ona tatou maua le faamalologa i le tino, mafaufau, ae faasilisili le agaga.

Talou Faatoese i le Atua: -

1. Ona ua tatou faaaoga seseina le pule ma le malosi ua tu'uina mai e le Atua i o tatou tagata;
2. Ua faagaloina o tatou tiute fai i totonu o nu'u ma le Ekalesia, aemaise lava i totonu o tatou aiga;

3. Ona o tatou manatu faasausili ua le mafai ai ona tatou faia lo tatou galuega tala'i.

Tatou Tatalo i le Atua: -

1. Ina ia tatou manatua pea ona tatou saili atu ia te IA i taimi e saogalemu ma taimi e fesoua'iina ai la tatou faigamalaga;
2. Auina mai le Agaga Paia e fai ma fesoasoani ia i tatou i taimi uma;
3. Fesoasoani ina ia tatou iloa ona ta'ita'i tagata ma le tonu ma le alofa, i totonu o tatou aiga, nu'u, faapea le tatou Ekalesia.

### **IULAI 10:**

Tusi Faitau: Efeso 1:3-14

Matua: f.12 - *"Ina ia aveia i matou ma ala e viia ai lona mamalu, o i matou o e na muai faamoemoe ia Keriso."*

Autū: **"O GALUEGA A LE TAGATA INA IA AUAUNA MA LE OLIOLI"**

Tatou Faafetai i le Atua: -

1. I lona alofa mai pea ia i tatou i lea aso ma lea aso, ua mafai ai ona tatou faatino feau ma galuega ua vala'auina ai tatou;
2. O loo saogalemu pea si o tatou atunu'u o Samoa, e ala lea i lana tausiga ma lana puipuiga malu;
3. I le musumusuga a le Agaga Paia, e faamanatu mai pea le faia o tatou tiute faamātua, e pei o le faamasani e aumai fanau i tapua'iga ma mea fai a le Ekalesia.

Talou Faatoese i le Atua: -

1. Auā ua tatou faia le galuega ma le tomumu, ua le maua ai se filemu i o tatou loto;
2. Ua galo ona tatou faafo'i le viiga i le Atua, ua ofi mai ai lagona e ono faavaivaia ai o tatou tagata galulue;
3. Ua tele ina ta'uta'u le suafa o le Atua, a ua le tusa ai ma mea o loo tatou faatino i totonu o tatou aiga, nu'u, faapea le Ekalesia.

Tatou Tatalo i le Atua: -

1. Mo le manuia o le galuega tala'i o loo fitaituga ai o tatou tagata o loo galulue i le galuega faamisonare i atunu'u mamao;
2. Faatasi mai pea auā la tatou pitolaau o loo faia pea i aso uma.
3. Ina ia maua le loto maulalo e te'ena ai faaososoga o le galuega.

### **IULAI 17:**

Tusi Faitau: Pese a Solomona 1:13-15

Matua: f.15 - *"Faauta, la'u uo e, ua e lalelei; faauta. ua lalelei oe, ua ni mata o se lupe ou mata."*

Autū: **"MANA O LE FAAMALOLOGA"**

Tatou Faafetai i le Atua: -

1. I le faamanatu mai pea, e leai lava se mea tatou te sulufa'i ai ma maua ai le malologa, ua na'o IA lava;
2. Ona o lona faatāuaina o lo tatou si'osi'omaga ma mea na IA faia, auā lava le tausiga o i tatou lana fanau;
3. E auala eseese le faailoa mai o lana faamalologa mo i tatou.

Tatou Faatoese i le Atua: -

1. Ua galo ona tatou saili atu ia te IA, a ua tatou saili i lo tatou iloa ma lo tatou malosi;
2. Faalotolotua o tatou lagona, ua le mautonu ma fememea'i ai filifiliga fai i totonu o tatou aiga ma Ekalesia;
3. Ua le iloa ona faamaulalo i le Atua, e faamagalalo mai ai o tatou vaivaiga faaletagata, i le manatu faasausili ma le loto ma'a'a.

Tatou Tatalo i le Atua: -

1. Tatou faalagolago i le Atua mo se tali i o tatou manaoga, ma ia tatalo faatauānau pea e le aunoa;
2. Fesoasoani i totonu o la tatou faigamalo, nu'u, faapea le lalolagi atoa ina ia tatou maua le alofa o le tasi i le tasi;
3. Auina mai lana faamalologa e ala lea i Ie Agaga Paia.

## **IULAI 24:**

Tusi Faitau: Salāmo 23:1-6

Matua: f.4 - *"E ui lava ina ou savali i le vanu o le ata o le oti, ou te le fefe lava i se mea leaga; auā o oe ta te faatasi ma a'u; o lau laau ma lou to'oto'o e faamafanafanaina ai a'u."*

Autū: **"SO'O SE MEA MA SO'O SE TAIMI"**

Tatou Faafetai i le Atua: -

1. I lona mafuta mai i so'o se taimi ma so'o se mea tatou te feagai ai;
2. I lana faasoa ia te i tatou i lo tatou matitiva i la le tino, le mafaufau, ma le agaga;
3. I le faafouina o lo tatou malosi i le tino, mafaufau, ma le agaga.

Tatou Faatoese i le Atua: -

1. Ona ua tatou faagaloina le Atua o le leoleo mamoe lelei, na te le tu'ulafoa'iina ana mamoe;
2. Ona ua tatou le faatuatua ma faalagolago i le faatasi mai o le Atua i taimi o tiga ma faigata;
3. Ona o lo tatou 'alo ese mai ala o le amlotonu, a ua tatou fiafia e ui i ala e faigofie ona talia.

Tatou Talalo i le Atua: -

1. Ina ia leoleoina pea o tatou aiga, nu'u, ma lana Ekalesia, mai mea leaga e faia e le fili;
2. Ia maua le lototele tatou te le fefefe ai e savavali i ala faigata;
3. Ia tumau pea le olioli i le Alii i so'o se taimi ma soo se aso.

### **IULAI 31:**

Tusi Faitau: Ioane 6:1-21

Matua: f.20 - *“A ua fetalai atu o ia, ‘O a’u lenei, ‘aua tou te fefefe.’”*

Autū: **“AUAI PEA LE ATUA MA I TATOU”**

Tatou Faafetai i le Atua: -

1. Ona o lona ‘auai pea ma i tatou i taimi lelei ma taimi leaga;
2. Auā o loo mulimulita’i pea lona alofa i so’o se tasi;
3. E le faapito lona alofa i se tagata, ma o loo vaaia pea ma faalogoina pea lona faatasi mai ia i tatou i soo se mea.

Tatou Faatoese i le Atua: -

1. Ona ua pogisa le tatou vaai i le tele o taimi, ua mafua ai ona tatou o ese ai mai ia te IA;
2. Ua manatu le tagata i lona malosi, ma ua galo ai e le mafai ona tu faamauga i luma o le Atua;
3. Ona o upu, o uiga, ma foliga faaalua e ona faavaivaia ai isi.

Tatou Tatalo i Le Atua: -

1. Tumau pea lona alofa ia i tatou, nei, seia o’o ile faavavau;
2. Ia iai pea lana puipuiga i si o tatou atunu’u; ia mamao ni mala ma ni faigata e ono lepetia ai o tatou tagata;
3. ‘Aua ne’i tu’ulafoa’iina tatou, ae ia faa’tasi mai i taimi uma.

## **AOKUSO 2021**

### **AOKUSO 7:**

Tusi Faitau: Salāmo 145:10-20

Matua: f.13 - *“O lou malo o le malo lea e faavavau lava; ma lau pule e au tupulaga lava lea.”*

Autū: **“E LE MAVAE LE ‘AUAI MAI O LE ATUA”**

Tatou Faafetai i le Atua: -

1. Ona o loo IA ‘auai ma faatasi mai pea ma i tatou, faatasi ai ma o tatou aiga, o loo salalau solo i itu e fa o le lalolagi;
2. I lana tausiga i a tatou fanau i a’oa’oga, aemaise e o loo i totonu o vaega ‘au, o loo tautuaina lo tatou malo ma le lalolagi atoa;
3. Auā e fou lava suiga e fai mai, ae tumau pea lou alofa mo i matou.

Tatou Faatoese i le Atua: -

1. Ua avea le le mautonu o manatu ma lape i lo tatou ola taumafai;
2. Auā ua galo ona tatou saili ma su’esu’e atu i le Atua i taimi o fita ma faigata o le olaga;
3. Ona o upu tatou te lafoina e ono faavaivaia ai isi.

Tatou Tatalo i le Atua: -

1. Ia faatasi mai pea le Atua i mea uma tatou te faia, ina ia mafai ona maua le galulue faatasi ma le ola felagolagoma’i;

2. Ina ia talia o tatou manaoga tu'uina atu i lea aso ma lea aso;
3. la maua le filemu i o tatou loto e ala i lona faatasi mai; ia alu ma le mana lana feau ina ia faaolaina ai tagata e to'atele.

**AOKUSO 14:**

Tusi Faitau: Ioane 6:24-35

Matua: f.27 - *“Aua tou te galulue i mea e 'ai e pala, a o mea e 'ai e tumau i le ola faavavau, e foaiina atu ia te outou e le Atali'i o le tagata; aua ua faaalitinoina mai o ia e le Atua le Tamā.”*

Autū: **"FAIGALUEGA LELEI INA IA TINO MAI"**

Tatou Faafetai i le Atua: -

1. I a'oa'oga e ala mai i le Tusi Paia, e mausali ai le ola faatuatua;
2. I le ola ma le malosi e faatinoina ai galuega fai i aso ta'itasi;
3. I le tele o faamanuiaga e ala lea i mea e tausi ai o tatou aiga, nu'u, faapea Ekalesia.

Tatou Faatoese i le Atua: -

1. Auā ua faasilisili lo tatou malosi ma lo tatou iloa, ae galo ai o nei mea uma sa foa'iina mai e le Atua e faatino ai lana galuega;
2. I lo tatou manatu māmā i o tatou tofiga i totonu o aiga, nu'u, faapea Ekalesia;
3. Ona ua galo ona faafetaia le Atua i mea ua tatou maua.

Tatou Tatalo i le Atua: -

1. la alofa mai ia maua le nofo lelei o aiga ua leai se filemu, ona ua le maua le loto maulalo;
2. la aumaia le potu ma le iloa, aemaise le alofa, ina ia fai ai le galuega ma le atoatoa;
3. Tutumau i le faamoemoe ma le faatuatua i le Atua, e lelei ma manuia ai galuega uma tatou te faia.

**AOKUSO 21:**

Tusi Faitau: Efeso 6:10-20

Matua: f.10 - *“O le toe upu lenei, ia outou loto tetele i le Ali'i, ma le malosi o lona mana.”*

Autū: **"AUA LE FEFE"**

Tatou Faafetai i le Atua: -

1. I le faamanatu mai pea ia i tatou lona silisili ese ma lona lelei;
2. Ona o le tele ma le anoanoa'i o lona alofa, poo le a lava lo tatou leaga ma le le atoatoa, o loo IA alofa mai pea;
3. Ona o lana tausiga i totonu o tatou aiga i lea aso ma lea aso; o loo IA puipuia ma malutia pea i tatou i ona a'ao alofa.

Tatou Faatoese i le Atua: -

1. Auā ua faaseseina o tatou tagata i le malosi ma le polo o loo ia i tatou ma ua galo ai ona toe faafo'i le viiga i le Atua;
2. Ona o le lava o lo tatou ola faatuatua, ma ua fai lea ma mea ua le faia ai le mea tonu ma sese ai a tatou filifiliga fai;
3. Ona o le a'oa'o o tatou fanau ina ia savavali i le upu moni a le Atua; ua tatou tu'ufau ma ua le mafai ai ona ofi se upu a matua.

Tatou Tatalo i le Atua: -

1. Ina ia 'aua ne'i manumalo le fili ma faaosoosoga i o tatou loto, a ia tumau ma mausali i le Atua le faavae moni;
2. Ia pule ma le tonu ma le faamaoni; 'aua ne'i faaseseina tatou i upu ma mea faafiafia o lenei olaga;
3. Ia fesoasoani i auauna a le Atua, o e e ala mai ai lana upu faamalosi mo tagata, ina ia latou faia le gaulega ma le faamaoni, ae 'aua le fefe e a'oa'o ma faatonu i le lafu mamoe.

### **AOKUSO 28:**

Tusi Faitau: Salamo 45:1-2

Matua: f.2 - *“Ua masa'a ifo i ou laufofoga upu alofa, o le mea lea e faamanuia ai oe e le Atua e faavavau.”*

Autū: **“IA IA TE OE LE ALOFA”**

Faafetai i le Atua: -

1. I le faa'itaiga ua aumai e ala ia Iesu ina ia tatou alolofa i tagata ese ma soo se tasi tatou te fetia'i i le ala;
2. Ona o mea ua foa'iina e faatino ai lo latou alofa atu;
3. Ona o loo maua pea avanoa tatou te fulitua ai i o tatou leaga, ae fuataiina ai o tatou tagata ina ia faia mea lelei.

Faatoese i le Atua: -

1. I lo tatou fulitua i e o loo mana'omia le fesoasoani;
2. Ua avea le tamaoiga ma mea ua galo ai ona tatou faia mea lelei mo tagata ese;
3. Tele taimi e manumalo ai le fili ma faaososoga i totonu o tatou aiga.

Tatou Tatalo ile Atua: -

1. Ina ia maua pea le fiafia e tatalo ai mo isi, e o loo alolofa mai ia i tatou, faatasi ai ma ē o loo fai fili mai ia i tatou;
2. Ia aumaia mafauauga lelei ma le loto tele e fesoasoani ai ma alolofa atu ai i isi tagata;
3. Faamalosi mai i taimi e o'o mai ai lagona o le faavaivai.

**SETEMA 2021**



**SETEMA 4:** (*Aso Sa o le Talalelei*)

Tusi Faitau: Mareko 7:24-37

Matua: f.29 - *“Ona fetalai atu ai lea o ia ia te ia, ”Ina alu ia ona o lau upu lena; ua te’a le temoni sa i totonu o-lau tama teine.”*

Autū: **“IA TAUTALA MA LOU MAUTINOA”**

Faafetai i le Atua: -

1. I lona fesoasoani e faamatala ai o tatou mata i mea e ono afaina ai o tatou tagata;
2. Ona o le faaaogaina o i tatou e o’o atu ai le ola i isi tagata;
3. Ia ‘aua ne’i fefe e tautala i upu mai le afioga paia a lo tatou Atua.

Tatou Faatoese i le Atua-

1. Tele o taimi tatou te faagaloina ai, ua valaauina i tatou e le Atua ina ia o’o atu le tala lelei i e o loo mafatia ma fia ola;
2. Ua tatou gūgū i mea leaga ne’i inosia ai i tatou, ae le fai lo tatou tiute ina ia iloa ai lo tatou alofa moni;
3. Ua le atoatoa la tatou galuega ona ua tatou faapalapala ma faapaiē i le vaivai o le tino ma le mafaufau.

Tatalo i le Atua: -

1. Ia lagona pea le faamalosi mai o le Agaga ina ia tatou tutula’i ma savavali e tusa ma ala ua uma ona a’oa’oina ai i tatou;
2. Ia ‘aua le fefe e tautala ma le mautinoa i le alofa ma le lelei o le Atua;
3. Foa’i mai le malosia i a tatou Ekalesia, ina ia ola pea le upu a le Atua i totonu o tatou loto ma o tatou aiga.

**SETEMA 11:**

Tusi Faitau: Iakopo 3:1-12

Mantua: f.6 - *“O le laulaufaiva o le afi lea. O le laulaufaiva o le faupu’ega lea o amio leaga ai le tino uma: ua faamuina ai le olaga nei uma lava; ua faamuina foi lena mai Kena.”*

Autū: **“E ITIITI LE LAULAUFAIVA, AE TO’ILALO AI MĀLŌ”**

Faafetai i le Atua: -

1. O loo ia faamanatu mai ia i tatou o tatou sese, e ala lea i upu tatou te tautatala ai e ono afaina ai mafutaga;
2. Ona ua ia faia auala e mafai ona tatou maua ai le loto maualalo, tatou te liliu ese ai mai o tatou sese ma agasala;
3. Ona o le itutino o le laulaufaiva, ua aumaia e tala’i ai le Tala Lelei ma faasoa atu ai le ola i upu tatou te tautatala ai.

Tatou Faatoese i le Atua: -

1. I le faaoga sese o o tatou laulaufaiva e ono afaina ai mafutaga;
2. Ona o lo tatou faaleaga i isi, ae galo ai e le o atoatoa i tatou i luma o le Atua;

3. I le le maua o le loto faamagalō, ua saisaitia ai tatou ona o tatou lagona ma manatu.

Tatalo i le Atua: -

1. Ina ia maua le agaga o le faamagalō atu ma faagalō;
2. Faatasi mai pea le Atua e faamalōsia o tatou tagata ina ia ‘aua le fiu gofie i mea fai i totonu o Ekalesia faapea aiga;
3. Ia faaaogaina o tatou laulaufaiva i ala e maua ai le ola.

### **SETEMA 18:**

Tusi Faitau: Faataoto 31:10-31

Matua: f.26 - *“Ua tautala o ia ma le poto; ua i lona laulaufaiva tulafono o le alofa.”*

Autū: **“IA MUAMUA LE ALOFA”**

Faafetai i le Atua: -

1. Ona o ana tulafono ina ia tatou mulimulita'i ai ma faatino lo tatou loto atu i le Atua;
2. I mafutaga ua mafai ona tatou osiaina ma maua ai se leleiga ma nisi o tatou uso a tagata;
3. O a'oa'oga ma a'oa'iga a mātua a o tatou ola ma tuputupu a'e.

Tatou Faatoese i le Atua: -

1. O loo tatou nonofo ma manuia ae le mafai ona faasoa atu i e o loo mana'omia le fesoasoani;
2. Ona ua tatou tutumau i le mea tuai, ua le mafai ai ona la'a atu i luma ona ua lelei lava le mea o loo iai;
3. I le le saili atu ia te ia ua le mafai ai ona lagona lona fetalai mai.

Tatou Tatalo i le Atua: -

1. Ia tatou maua le loto alofa ma le fefaasoa'i i mea e manuia ai o tatou nu'u, aiga, ma Ekalesia;
2. Aveese o tatou manatu faamaualuluga, ae ia iloa ona faatino le ola auauna ma le loto maulalo;
3. Faia i tatou ma mea e tosina mai ai ni agaga mo le Atua.

### **SETEMA 25:**

Tusi Faitau: Eseta 7:1-6

Matua: f.2 - *“Le masiofo e, Eseta, se a le mea e te ole mai ai? e avatua lava ia te oe; pe se a foi le mea e te faatoga mai ai? e oo lava i le vaeluaina o le malo e faia lava.”*

Autū: **“TOA MO LE LELEIGA O LE LAUTELE”**

Faafetai i le Atua: -

1. Ona o le tele o fita o le olaga o loo fetai'a'i ma i tatou, ae o loo IA faatasi mai pea ma i tatou;

2. I le aumaia o le loto toa e mafai ona tautala ai ma folafola atu lana feau ma lona finagalo;
3. Ona o lana puipuiga ma lana faamalologa i o tatou tino, mafaufau, faapea le agaga.

Faatoese i le Atua: -

1. Ona o le ma'a'a ma le faataliga tutuli pea o tatou loto i le Atua ma lona valaau;
2. Ona o le faia pea o tatou loto ae tu'u lona finagalo paia;
3. Ua le mafai ona tatou maua le loto salamō e fulitua ai i le leaga.

Tatou Tatalo i le Atua: -

1. Ia fesoasoani mai i taimi ua tu'ulafoa'iina ai tatou ma ua faalogo pei ua leai se faamoemoe;
2. Fesoasoani i o tatou aiga ina ia maua le alofa moni;
3. Ia maua le toa ina ia pule ai ma le alofa mo tagata uma.

## OKETOPA 2021

### OKETOPA 2:

Tusi Faitau: Roma 5:6-11

Matua: f.8 - *"A ua faaalitinoina mai e le Atua lona lava alofa ia te i tatou, ina ua malii Keriso ma sui o i tatou, a o tatou agasala pea."*

Autū: **"O LE SATAURO LE TAU O LOU SA'OLOTOGA"**

Tatou Faafetai i le Atua: -

1. Ona o le silisili ese o lona alofa, ua avea ai Keriso ma faailoga, ua o'o lava i le satauro, e totogi ai le tau o le tatou sa'olotoga;
2. Ona o le taulaga tutasi sa osia e lesu, e le toe faaluaina, ae manoa'omia ona tatou tali atu i le usiusita'i ma le salamō;
3. Ona ua manino tatou uma, ua na o lesu lava tatou te maua ai le sa'olotoga moni, pea afio tumau o IA i o tatou loto ma agaga.

Tatou Faatoese i le Atua: -

1. Ona o lo tatou ola masalosalo, ua mafua ai ona femoumoua'i olaga o le to'atele; ua galulue fo'i nisi ae faatumutumulima ona fai, ona e le o o'otia ma loloto le alofa i le Atua.
2. Ona o lo tatou ola faatausuai, ma ua faifai ai Keriso e le lalolagi, ina ua avea le satauro ma mea teu fale, e faamatagofie ai le va'aiga i fafo, a ua leai se uiga moni i o tatou olaga;
3. Ona ua le mafai lava ona faasa'olotoina o tatou olaga agasala, ina ua tatou faalagolago i galuega lelei e tele ua tatou faia.

Tatou Tatalo i le Atua: -

1. Ia fesoasoani mai lona Agaga, ina ia tatou iloa ma malamalama i le uiga moni o le ola ofoina atu mo IA ma lona finagalo;

2. Ina ia tatou ola ma le mautinoa, o i tatou o le Ekalesia ola ma tautua sa'oloto, ona ua fai le satauro ma lē na tautau ai, ma totonugalemu o mea lelei uma;
3. Ina ia fai le satauro o Keriso ma faailoga moni o lo tatou sa'olotoga, ina ua faasatauroina ai o tatou tagata tuai, ae viia le Atua i o tagata fou.

**OKETOPA 9:** (*Aso Sa o le Lotu Tamaiti*)

Tusi Faitau: Luka 5: 1-11

Matua: f.10 - *“Ona fetalai lea o Iesu ia Simona, ‘Aua e te fefe, e amata i nei ona po ona e maua tagata.’”*

Autū: **“O TATOU O TAGATA FAI FAIVA”**

Tatou Faafetai i le Atua: -

1. Ona o le faamoemoe o le Ekalesia mo a tatou tupulaga, ina ia avea fanau e fai ma Kerisiano tausa'afia, e faaaoga tatau taleni ma agava'a ua latou maua mai le Atua, e atina'e ai aiga, o nu'u, ma le Ekalesia;
2. Ona o galuega a le aufaigaluega galulue, e saunia ai tupulaga ia iloa ola fuafua i fesuia'iga o le lalolagi ua a'afia ai;
3. Ona o le avea o i tatou ma tagata fagogota, auā o le galuega tala'i ma le galuega e saili agaga ma a'oa'o atu, e lē faapitoa na o le faifeau, ae mo so'o se tasi ua fai ma Kerisiano, e pei ona fetalai Iesu, *“Ou te faia outou ma fai faiva i tagata.”*

Tatou Faatoese i le Atua: -

1. Ona o le faatamala o mātua i o latou tofi ma faiva na tu'uina mai e le Atua, ina ia tausi, a'oa'o, ma a'oa'i i le fanau i ala o le Alii;
2. Ona o le faatamala o le Ekalesia i ona tiute, auā le lagolago sua i mātua ma aiga, i le faafaileleina o fanau i le ola faaleagaga;
3. Ona ua tatou manatu faapito ma ua tatou le saili ma fesoasoani atu i fanau ua le iloa ma ua taumamao ma le Alii, ina ia toe aumai i totonu o le aiga o le Atua.

Tatou Tatalo i le Atua: -

1. Ina ia galulue faatasi itutino uma o le Ekalesia i totonu o nu'u, o atunu'u, ma soo se malō, auā se lumana'i manuia o tupulaga;
2. Ina ia tupu ma ola pea le faamoemoe lelei, ma le mana'o o le Ekalesia ina ia faa-Kerisianoina ona tupulaga, ma ia tutupu ma ola malolosi i le tino, mafaufau, ma le agaga, e fai ai i latou ma ave feau o le Tala Lelei i le lumana'i;
3. Ina ia faamanuia le Atua i tupulaga lalovaōa.

**OKETOPA 16:**

Tusi Faitau: Esoto 18:17-27

Matua: f.23 - *“Afai e te faia lena mea, a fetalai mai foi le Atua ia te oe faapena, ona e lavā tumau lea; o lenei nu’u uma foi, latou te maua atu le mea latou te nonofo ai ma le manuia.”*

Autū: **“IA AMANA’IA FAUTŪAGA A LE ‘AU MATUTUA”**

Tatou Faafetai i le Atua: -

1. Ona o le faamalumaluga ma le to’amalie o aiga, nu’u, ma Ekalesia, o loo leoleoina ma puipuia e le leo faa-perofeta o le ‘au-matutua, o loo iai le tofa loloto ma le tofa matua faale-Atua, e to’a ai peau lagalaga o le olaga;
2. Ona o Keriso, na faia to’atasi le galuega lavea’i mo i tatou, e ala i lona maliu ma toe tu mai le oti ma le tuugamau.

Tatou Faatoese i le Atua: -

1. Ona ua mao faatuatuaina nisi o le ‘au-matutua, ina ua avea lo latou ta’u matuaina, ua tula’i mai ai nisi o faafitauli lē ma’alofia i totonu o aiga, nu’u, ma Ekalesia;
2. Ona o le ‘au matutua ua fiafia e se’ei i le ta’u matuaina, ae galo ai ona faatino o latou tofi faufautua mo se lelei o aiga, nu’u, ma le Ekalesia;
3. Ona o tupulaga ua avea le potō ma le atamai ua latou maua, ua le amana’ia ai fautuaga a ē matutua, ua loa lo latou soifua auauna i aiga, nu’u, ma le Ekalesia.

Tatou tatalo i le Atua: -

1. Ina ia faaoaina pea le ‘au matutua i fua o le Agaga, e maua ai le tofa ma le faautaga loloto, auā se manuia ma le nofo lelei o aiga, nu’u, faapea le Ekalesia;
2. E faamanuia i le ‘au matutua, o tua’ā sinasina o le atunu’u, ae maise o tamā ma tinā o le Ekalesia, o lo’o punounou pea ma le le faalogologo tigā, auā le tautuaina o le Atua ma lona finagalo paia;
3. Ina ia faato’ateleina i totonu o aiga, nu’u ma Ekalesia, le ‘au matutua e iai le tofā faale-Atua, latou te faato’afilemuina ai mea uma e tula’i mai, e fevaevae’i ai o tatou tagata.

### **OKETOPA 23:**

Tusi Faitau: Kalatia 5:22-26

Matua: ff.22-23 - *“A o le fua o le Agaga, o le alofa, o le olioli, o le filemu, o le onosai, o le mataalofa, o le agalelei, o le faamaoni, o le agamalu, ma le amio mamā, e le faatulafonoina mea faapena.”*

Autū: **“O FUA O LE AGAGA”**

Tatou Faafetai i le Atua: -

1. I le foa’i mai o mea alofa o le Agaga e faatamaoigaina ai i tatou, ma ia fua mai i o tatou olaga, e le gata tatou te manuia ai, ae manuia ai foi ma o tatou aiga, o nu’u, ma Ekalesia;

2. Ona o le alofa, olioli, filemu, onosa'i, agalelei, ma le faamaoni; o fua matagofie tatou te molimauina ai lo tatou ola feso'ota'i i le Atua;
3. Ona o lana faasinoga tatou te ola ai i la le Agaga, ma savavali ai fo'i i le Agaga.

Tatou Faatoese i le Atua: -

1. Auā e ui i se matagofie felanulanua'i o fua o le Agaga, a ua tatou fialia pea i la'ei faatosina a le lalolagi e tupu ai le agasala;
2. Ona ua tatou popoto e tauloto le alofa faamaoni ma le amlotonu, a ua tatou valelea e ola ma savavali ai;
3. Ona ua tatou le saili i le Agaga Paia ma lona atoatoa e faafouina ai o tatou tagata, a ua tatou saili i lo tatou lava iloa.

Tatou Tatalo i le Atua: -

1. Ina ia faapupula o tatou mata o le faatuatua, tatou te iloa ai ona soifua i fua o le Agaga;
2. Ina ia faatumauina tatou e le Agaga Paia i aso uma, auā o lo tatou Fesoasoani Sili lea mai le Atua, e le mafai ai ona tatou faia'ina i le faataunu'uina o le ola vala'uina.

### **OKETOPA 30:**

Tusi Faitau: Mataio 8:5-13

Matua: f.13 - *“Ona fetalai atu lea o Iesu i le ta'ita'i o le to'aselau, 'Ina alu ia, e pei ona e faatuatua, ia faapea lava ona faia mo oe.'*

Autū: **“O LE TAUI O LE FAATUATUA”**

Tatou Faafetai i le Atua: -

1. Ona o lana meaalofa o le faatuatua, ua tatou faalagolago ai i mea ua faamoemoe iai, ma le mautinoa i mea e le o va'aia;
2. Ona o lona silasila mai i tagata faatuatua ma e ua talitonu atoatoa ia te ia, na te faia ai galuega ofoofogia ma galuega silisili ese mo i latou;
3. Ona o lona alofa mo tagata faatuatua uma e mulimuli ia te IA ma le faamaoni, e aunoa ma se faamoemoe i se taui.

Tatou Faatoese i le Atua: -

1. Ona o le femoumoua'i o lo tatou faatuatua, e gata a i le upu ma le gutu la tatou tatalo, ae le o iai o tatou loto atoa;
2. Ona o le tele o taimi, e muta la tatou va'ai, ma fai a tatou faai'uga i mea ua va'aia e aunoa ma le faatuatua i le galuega mana o le Agaga;
3. Ona ua tatou naunau ina ia foa'i mai e le Atua le taui i o tatou tagata, ae tatou te le o atoatoa ma faamaoni i le tu'uina atu o o tatou tagata e faatino ai lona finagalo.

Tatou Tatalo i le Atua: -

1. Ina ia tupu lauolaola lo tatou faatuatua, tatou te faia ai galuega alofa ma mea lelei uma e viia ai lona suafa paia e faavavau;
2. Ina ia faamalosi 'au mai le Agaga ia te i tatou, tatou te mafaia ai ona tumau ma taofi mau i lo tatou faatuatua ia Iesu Keriso;
3. Ina ia avea lo tatou faatuatua e fai ma puna o le malosi i taimi o puapuaga ma faigata, ma maua ai e isi o tatou uso le loto tele e faato'ilalo ai le tiapolo ma ana faaososoga.

## NOVEMA 2021

### NOVEMA 6:

Tusi Faitau: Luka 15:1-10

Matua: f.2 - *"Ona muimui ai lea o le 'au faresaio ma le 'au tusiupu, ua faapea ane, 'Ua talia e lenei tagata o e agasala, ua 'aai faatasi foi o ia ma i latou.'"*

Autū: **"OLA I LE ALOFA"**

Tatou Faafetai i le Atua: -

1. Ona ua a'oa'o mai e le Alii lona finagalo mo i tatou uma, lona alofa e lē faatuaoia, o lona soifua saili ma le filigā, ma lona olioli e le mataofia, e fai ma ta'iala i le soifua ma lo tatou ola;
2. Ona o IA lava na mua'i saili mai e ala i lona Alo Pele o Iesu Keriso, i lona tino na momomo, ma lona toto na maligi, o le tau lea o le sa'olotoga mo o tatou tagata agasala;
3. Ona e ui lava ina tatou sese ma leiloa i le agasala, ae saili mai pea ma valaau mai pea le Atua ia tatou fo'i atu, tatou te olioli faatasi ma IA i lona aiga faalelagi.

Tatou Faatoese i le Atua: -

1. Ona ua faigofie ona tatou leiloloa i totonu o o tatou aiga, ina ua tatou le usita'i i ana poloa'iga; ua le lagonaina ai le mafanafana o le ola femulumulua'i o se mafutaga o ni uso e nonofo faatasi;
2. Ona ua tatou u'u le suōtosina ma tepa i tua, ona ua faamuamua le faamalieina o o tatou tu'inanauga faaletagata, ae faamulimuli le ola ofoina mo le Atua;
3. Ona ua tosina pea la tatou va'ai i le felanulanua'i o le lalolagi, ua tatou pa'uū ai pea i le loloto o le vanu o le agasala.

Tatou Tatalo i le Atua: -

1. Ia faasusulu mai lona malamalama, e soluia ai lo tatou posiga faaleagaga, ma manino ai la tatou va'ai i le malamalama o Iesu Keriso ma le Tala Lelei;
2. Ina ia faatumu i tatou i lona alofa tunoa, tatou te le fefefe pe matata'u ai, i taimi o puapuaga ma faigata o le ola vala'auina;

3. Ina ia tatou faatāuaina avanoa e fai ai i tatou ma molimau ola o le Tala Lelei, auā o la tatou galuega fai faatasi, o le faaolaina lea o tagata uma i le ola e faavavau.

### **NOVEMA 13:**

Tusi Faitau: Mataio 25:1-13

Matua: f.13 - *“Ia outou mataala ai, auā tou te le iloa le aso po o le itu aso.”*

Autū: **“MATAALA I OU TIUTE”**

Tatou Faafetai i le Atua:

1. Ona o tiute tauave o le Ekalesia, e faapei o taupou popoto, e ola tapenapena ma tauaveina pea suau’u, a o galulue ma faatalitali i le afio mai o le faato’afaiava;
2. Ona o le tele o lona alofa, ua IA faaaogaina ai o tatou tagata faatauva ma le le atoatoa, a o tatou feagai ma o tatou tiute tauave i aso ta’itasi;
3. Ona o le tatalo ma le galulue mataala o le ‘au faatuatua Kerisiano, i le tala’iina o le Tala Lelei ma le sailiga o agaga e faaolaina mo lona malo.

Tatou Faatoese i le Atua: -

1. Ona o lo tatou ola faapalapala i o tatou tiute tauave ua vala’auina ma tofofi ai i tatou, e le Matai o le galuega;
2. Ona ua leai se ola tauivi o le Ekalesia i ana feau ua tofia ai;
3. Ona ua tauau ina mate le ola tapua’i o o tatou tagata, ma ua faasolo lava ina matūtū ai lo tatou suau’u faaleagaga.

Tatou Tatalo i le Atua: -

1. Ina ia tatou malamalama i le uiga o lo tatou faimalaga i le olaga faale faatuatua, e mana’omia le utu faatumu ma ia lava le suau’u, e matinoa ai le taunu’u manuia o la tatou faigamalaga;
2. Ina ia saunia le Ekalesia e faaaoga le atamai ma le faautauta lelei, e tapenaina ai tagata uma mo le malo o le Atua;
3. Ia tumau lo tatou galulue faamaoni pei o taupou popoto, a o tatou faatalitali e faafeiloa’i atu ma le fiafia, le Alii le faatoāfaiava, ma ia tumau pea lo tatou mataala, e tete’e atu i le matapoto o le tiapolo.

### **NOVEMA 20:**

Tusi Faitau: Esoto 36:2-5

Matua: f.5 - *“Ua latou fai mai ia Mose, ‘Ua tele lava mea ua aumai o le nu’u e sauni ai le galuega na poloa’i mai ai le ALII ia faia, o le a totoe.”*

Autū: **“O LE FOA’I UA LE MAFAITAULIA”**



Tatou Faafetai i le Atua: -

1. Auā po’o le a le itiiti ma le faatauva’a o se foa’i ua faia ma le talitonu i lona alofa, o IA lava na te faateleina mo le manuia ma le matagofie o se faamoemoe;
2. Ona o le faata’ita’iga sili o le ola foa’i na IA saunia e ala i lona Alo Pele, na foa’i fuaina mai e maliu mo le lalolagi agasala;
3. Mo avanoa lelei e ala i mea e tutupu i le olaga, ua mafai ai ona faatino le ola foa’i a lau fanau e fesoasoani atu ai i isi ua mana’omia.

Tatou Faatoese i le Atua: -

1. Ona a lutia lo tatou ola galulue i fita ma faigata, ona tatou muimui lea ma le saili i le Atua ma lana amlotonu, a ua tatou faamoemoe i malosi ese’ese, ua fenumia’i ai o tatou lagona;
2. Ona ua tatou faatalalē i o tatou tiute e ao ona fai, o le ola foa’i lea mo le manuia o le Ekalesia;
3. Ona ua tatou fai meaalofa mo le galuega a le Atua mo so tatou lava viiga, ae le ose viiga o le Atua.

Tatou Tatalo i le Atua: -

1. Ina ia faatumauina lona mana silisili ese, ma ona a’ao lavea’i i o tatou luga, tatou te finafinau ai ma le faamaoni ma le amlotonu, e faatau’u mea uma mo lona viiga;
2. Ina ia avea le maua’a o lo tatou ola faatuatua ma le foa’i ma le loto malie, e momoli atu ai se feau i nisi ia faapea ona latou fai;
3. Ina ia faaaogaina pea o tatou tagata ma mea uma ua ia te i tatou, e o’o lava i o tatou ola, mo le manuia o lana Ekalesia ma ona tagata, e faateleina ai pea le viiga o le Matai Sili i le lagi.

## **NOVEMA 27:**

Tusi Faitau: Luka 17:11-19

Matua: ff.17-18 - *“Ona fetalai atu lea o Iesu, ‘E le’i faamamāina ‘ea le to’asefulu? A o ifea le to’aiva? Ua le iloa ‘ea ni e toe foi mai e vivii atu i le Atua, na o lenei tagata ‘ese?’”*

Autū: **“O LE AGAGA FAAFETAi”**

Tatou Faafetai i le Atua: -

1. Ona e ui i le femoumoua’i o le tagata i le va ma IA, e le tu’ua ai lava lona alofa ina ia magalo ai le tagata agasala;
2. Ona ua IA lē tau i sui mai ia te i tatou, ma ua le amanaia o tatou vaivaiga e tele, ona o lona alofa ia aofia tatou uma i lana faaolataga;
3. Ona ua IA faafogaina le lagona faafetai a le to’atasi, e fai ma sui o le to’aiva o e ua to’ilalo i le agasala ma le toe fo’i atu e faafetai e tusa ma lona alofa.

Tatou Faatoese i le Atua: -

1. Ona ua tatou faagalo ona momoli le faafetai i faamanuiaga ua foa'i mai, ma faafo'i atu le viiga ia te IA i aso uma e le aunoa;
2. Ona ua avea lo tatou mau'oa i manuia e tele ma ala ua faato'ilaloina ai i tatou i le mana'o lasi, ma ua galo ai se faafetai i lē ua tatau ma onomea ona ave iai;
3. Ona ua tau le maua se agaga faafetai i le Atua i a tatou tatalo, a ua faatumulia i mea tatou te manan'o iai.

Tatou Tatalo i le Atua:

1. Ina ia galue pea le Agaga i totonu ia i tatou, ina ia ola lausiusi i o tatou loto le lagona o le fia faafetai i le Atua i taimi ma aso uma;
2. Ina ia talia mai la tatou faafetai lē lava, ona o lona alofa muti-mutivale ua tatou iloa ai, ma lona faapaiaina o o tatou loto, ua tupu lauolaola ai le fatu o le Tala Lelei ua tatou manuia ai;
3. Ina ia aveesea e lona lava mana mea uma ua pogisa ai la tatou va'ai, ma mea ua faigata ai ona faaleo lo tatou agaga faafetai i faamanuiaga e tele ua IA saunia mo i tatou.

## TESEMA 2021

### **TESEMA 4:**

Tusi Faitau: Ioane 1:1-11

Matua: f.9 - *“O le malamalama moni lea, na te faamalalamaina tagata uma lava o loo ua maliu mai i le lalolagi.”*

Autū: **“SAUNI MA TAPENA MO LE AFIO MAI O LE ALII”**

Tatou Faafetai i le Atua: -

1. Ona e matuā leai lava se isi malosi e faalavelave i le afio mai o Iesu i le lalolagi e pei ona valoia; o se poto fo'i ma se atamai maoa'e ma tulaga ese, e le mafai lava ona taofia ai;
2. Ona ua mae'a ona tapena le fanau a tagata i le tino, mafaufau, loto, ma le agaga, e pei ona auina mai ai ana perofeta ma auauna i le lalolagi;
3. Ona o lo tatou faalogoina pea o lona si'ufofoga i le alofa ma le faamaoni, o lana amlotonu fo'i e le faaseseina ai se tagata, auā o lona finagalo lea, ia atoatoa lana faaolataga mo le lalolagi.

Tatou Faatoese i le Atua: -

1. Ona e ui o se feau tauologologo mo tagata uma, a e to'atele lava i latou e le taliaina. O nisi fo'i e vaai maulalo iai, ona e le fia auauna, ae fia avea ma tupu ma naunau i le 'oa ma le tamaoaiaga;
2. Ona o le lē mamā ma le lē tumau o tatou loto i le Alii, ua tatou lagona ai le ma 'asiasi i ona luma; o foliga ia o lo tatou te'ena pea o Keriso;

3. Ona o le pupū o tatou loto i mea a le lalolagi, ma le faamalieina o o tatou tu'inauga faaletagata, ua tatou faatamala ai e tapenapena mo Keriso ma lona toe afio mai.

Tatou Tatalo i le Atua: -

1. Ina ia saunia i tatou uma mo le toe afio mai o Iesu Keriso. Ia faatupuina e le Agaga Paia lo tatou naunau e faalaulelei ona ala, faaeaina vanu, ma faalaugatasia ma faamaulaloina mauga;
2. Ina ia manatua pea e i tatou uma le fanau a tagata i le lalolagi, o mea uma sa lafotūina i lalo, ua toe faatutūina, o mea sa tuai ua toe faafou, ma mea uma ua liliuina ia atoatoa ona lelei, ona o Keriso le atoaga o le alofa tunoa o le Atua;
3. Ina ia faasilisili ona saunia o tatou loto e talia ai le pepe paia o le a fanau mai, o le Atua liutino tagata.

### **TESEMA 11:**

Tusi Faitau: Mataio 3:1-6

Matua: f.3 - "O le leo o le ua alaga i le vao, 'Ina teuteu ia e outou le ala o le ALII, ia faalaulelei ona ala.'"

Autū: **"IA SAUNIA LE ALA"**

Tatou Faafetai i le Atua: -

1. Ona o ana folafolaga ma valoaga e pei ona faaleo e Perofeta i le valoia o le Mesia, o Iesu lava na faataunu'uina ai;
2. Ona o lenei lava vaitau ua tatou nonofo sauni ai e tali atu i le atoaga o le alofa tunoa o le Atua e ala i le pepe fou na fanau i le fale o manu, o le faailoga o le loto maualalo ma le agamalu;
3. Ona o le Agaga o le Kerisimasi e tapena ai tatou e faasoa atu i isi tagata le fiafia ma fai tatou ma molimau faamaoni mo Iesu ma le Tala Lelei, ma o le tiute fo'i lea o so'o se Kerisiano moni.

Tatou Faatoese i le Atua: -

1. Ona o le faatumulia o i tatou i le le mautonu ma le faalotolotolua, le faamaualuga ma le faasausili, ua le mafai ai ona maua se avanoa mo Keriso i o tatou loto;
2. Ona o le papa'u o lo tatou faatuatua, ua vaivai ai lo tatou ola tala'i atu, ua faigata ai fo'i ona suluia o tatou loto ma mafaufau, i le malamalama o le Keriso manumalo;
3. Ona ua tatou faataligatuli i le alaga mai o le leo, "*Ina teuteu ia le ala o le Alii*", auā ua tatou fiafia lava e ola ma savavali i ala o le lalolagi, a o ala e taunu'u i faigata ma puapuaga.

Tatou Tatalo i le Atua: -

1. Ina ia pulea e le Agaga o tatou mafaufau, o upu ma galuega, ma faaaoga lo tatou ola e faailoa atu ai le uiga loloto ma le tāua, o loo faamanatuina ai le fanau mai o le Mesia i lenei Kerisimasi;

2. Ina ia avea pea Iesu Keriso ma totonugalemu o lo tatou ola, ae le o i tatou lava, e manuia ai mea uma tatou te faia.

### **TESEMA 18:**

Tusi Faitau: Isaia 12:2-6

Matua: f.2 - *“Faauta, o le Atua, o lo’u faaolataga ia, ou te faatuatua, ou te le fefe; Auā o le ALII le Atua, o lo’u malosi ia ma la’u pese; ua avea foi o ia mo’u faaolataga.”*

Autū: **“VA’AI PEA I LUMA”**

Tatou Faafetai i le Atua: -

1. Ona o lona alofa tunoa ua laveaiina ai i tatou uma o e talitonu ma faatuatua ia te IA;
2. Ona o le faaolataga e ala ia Iesu ua tatou toe lelei ai ma le Atua, ma tatou maua ai le ola i lona malo e faavavau;
3. Ona o le Agaga Paia o lo tatou fesoasoani sili lea, i taimi uma ma aso uma tatou te feagai ai ma faafitauli o le olaga.

Tatou Faatoese i le Atua: -

1. Ona ua galo ia i tatou le viiga ma le faafetai e faafoi i le Atua pe a mavae faafitauli ma faigata na laveaiina ai tatou;
2. Ona o lo tatou ola faamasiono atu ma maitau sese o isi, ua le maua se nonofo lelei ma se nonofo fealofani;
3. Ona o lo tatou ola to’ilalo i le tiapolo ma ana ‘au, ina ua tatou faia’ina i o tatou lava lagona ma manatu.

Tatou Tatalo i le Atua: -

1. Ina ia tumau pea le Agaga Paia e ta’ita’ina i tatou ma faamalosi lo tatou naunau i lana galuega;
2. Ina ia tatou maua meaalofa a le Agaga e fai ma aupega e tau ai le tau faaleagaga;
3. Ina ia susulu mai lona malamalama i o tatou ala pogisa, tatou te iloa ai lona manuia ua uma ona saunia mo i tatou.

### **TESEMA 25:**

Tusi Faitau: Luka 2:8-20

Matua: f.12 - *“O le faailoga lenei ia te outou, e iloa ai e outou le tama meamea ua ‘aūi i le ‘ie, o loo taoto i le fale o manu.”*

Autū: **“O LE FANAU MAI O IESU”**

Tatou Faafetai i le Atua: -

1. Ona o lona alofa tunoa ua fetau ai mea lē fetau i lona finagalo, i le faatauva’a ma le maualalo o le ala na IA filifilia, na fanau mai ai i le fale o manu; tatou te iloa ai e leai se mea e faigata i le Atua;
2. Ona o lona afio mai i se ala maualalo i lona lava aiga, ua tusa ai o IA ma tamaiti e fananau mai i totonu o tatou nu’u ma aiga;

3. Ona ua taunu'u lona faamoemoe, e ui sa le'i sauni Isaraelu le nu'u filifilia, a ua saunia e le 'au Makoi meaalofa fa' atupu, e tali atu ai i le afio mai o le Mesia.

Tatou Faatoese i le Atua: -

1. Ina ia tatou lagona pea ma le loto faamaulalo i lenei Kerisimasi, le faamaulaloina e le Atua, ina ua auina mai lona Alo e to'atasi i lenei ala faigata, ina ia faaolaina le lalolagi;
2. Ina ua afio mai o IA o le Mesia ma le Tupu, a e to'aitiiti i latou na talia ma le fialia lona fanau mai. E le o le ala ea lea o lona inosia ma lona tu'ulafoa'iina?
3. Ona ua faigata pea ona tatou malamalama i le uiga moni o le Kerisimasi, na malaga ai Makoi i Peteleema, atoa ma leoleo mamoe, ina ua manino ia te i latou le uiga moni o le malo ua IA aumaia.

Tatou Tatalo i le Atua: -

1. Ina ia avea lenei vaitau o le Kerisimasi e faatumuina ai o tatou loto i le olioli, i lona fanau mai o le tagata, auā le galuega o le faaolataga;
2. Ina ia tatou mua'i lagona foi e i tatou uma ta'ito'atasi, le uiga moni o lo tatou foi fananau mai, mo se faamoemoe lelei aupito sili ona loloto ma aogā, mo le finagalo o le Atua ma lona malo;
3. Ina ia tatou lagona uma, le alofa silisili ese o le Tamā mo i tatou, atoa ma le faaolataga ua saunia e IA, mo so'o se tasi e faatuatua ia te IA.

\*\*\*\*\*

### **TAUTINOGA MAFUTAGA AU LEOLEO**

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galueaina ai le ola faaleagaga o le 'au faatuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le faatuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

*Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseesea o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!*



**Tautua Printing Press**  
1 Kanana Fou St, P.O. Box 1537  
Kanana Fou, American Samoa 96799  
(684) 699-9810  
<https://efkasonline.org>